

ALFA presente na e congreso di Pink Orange Alliance

ORANJESTAD - Durante e periodo di 24 di te cu 28 di October ultimo, tres representante di ALFA a reuni na e isla di Bonaire pa e congreso di Pink Orange Alliance.

Participantenan di Corsou, Bonaire, Sint Maarten, Statia, Saba y Hulanda hunto cu Aruba a papia over e problemanan tocante di e persona homosexual of LGBTI y kico hunto nos por haci pa defende nos derecho como un ser humano algo cu na 2013 ainda no ta wordo respeta como debe ser. Iglesiasnan, cierto politiconan, cierto prensa y cierto personanan den nos comunidad ainda no ta respeta y viola e derechonan di un ser humano keriendo pasobra bo ta homosexual lo bo ta vulnerabel pa insulto, stigma y discriminacion.

E meta di e congreso ta pa uni y duna mas forza na e organisacionnan cu si ta respeta e comunidad sexo diverso. E enfasis ta basa riba e derechonan di un ser humano. Tur e representantenan ta boga pa e derechonan igual di un ser humano algo cu sigur lamentablemente no ta

wordo respeta como debe ser. Personanan ta wordo kita for di nan trabou pa e hecho cu nan ta homosexual sin mira y tene cuenta cu nan potencial den e mercado laboral.

Lesando e rapport di UNICEF tocante e hobennan di Aruba por nota cu no tin ningun palabra skirbi tocante e comunidad sexo diverso. Manera cu tur hende sa, ta hustamente e hobennan sexo diverso ta wordo maltrata fisicamente y mentalmente na cas y na scol. Esaki ta algo cu Pink Orange Alliance a bisa ta basta y cu nos esfuerso y ayudo for di entre otro Hulanda, e seis islanan y union Europeo nos lo combati esaki. Un di e maneranan di combati esaki ta sigur educacion den orientacion sexual y reproduccion na scol, siña conoce bo balar y derecho como un ser humano y haya forza pa combati e inhusticia cu ta wordo haci na abo como persona djis pasobra bo a nace homosexual, heterosexual, homber of muhe.

Pueblo mester haya mas informacion tocante e derechonan di un ser humano y

no keda enfoca riba un famia ideal di mama, tata y yiu cu ta exclui otro tiponan di famia (p.e. cu mayornan di mesun sexo, mama of tata soltero) cu "gender roles" rigido y cu no ta cuadra cu e realidad di awendia. ALFA y Pink Orange Alliance no kier tende mas e excuus cu pueblo no ta cla ainda, ta Tabu, ta contra nos norma y balornan, ta contra nos religion y cu e no ta pas den nos cultura. Ban uni hunto y traha riba e problematica entre otro di abuso sexual, maltrato den hogar, criminalidad y con pa sostene nos economia.

ALFA sigur lo keda sostene y duna counseling y educacion na e comunidad, pero como organizacion lo bira mas activo den e sentido di combati e desigualdad cu ta reinando pa e comunidad homosexual aki na Aruba.

Cambiando di tema y cu hopi orguyo nos kier anuncia e cinco reconocimiento cu pais Aruba a ricibi pa e Humanitarian Award na Boneiro. Un persona a ricibi e Humanitarian Group Award, 2 persona a ricibi e



Humanitarian Achievement Award y dos persona a ricibi e Humanitarian Activist Award. Un ehempel pa personanan cu

tin e curashi di publicamente expresa nan orguyo y lucha pa igualdad. Un pabien pa e logro aki. □